




HURIA KRISTEN BATAK PROTESTAN (HKBP)
RESORT BALIGE
(Huria Balige, Sibuntuon. Aek Bolon, Tiberias, Sihailhail)

PARTORDING NI PARPUNGUAN
PESTA PARJOLO ARI HARORO NI TONDI PARBADIA
(PENTAKOSTA I)



TOPIK:
ULAON NI TONDI PARBADIA
DI NGOLU NI ANGKA NA PORSEA
(Johannes 14:15-26)

MINGGU: 08 JUNI 2025

01. Joujou Tu Pesta Pentakosta

U1: Selamat Ari Pentakosta ma di hamu saluhutna!

H: Selamat Ari Pentakosta ma tutu!

U2: Huria ni Tuhanta, las ma rohanta ai nunga jumpang na binabagabagahon ni Tuhanta Jesus, ai didok do andorang so manaek Ibana tu banua ginjang: Ndang tadinghononHu hamu so marama, na ro ma Ahu mandapothon hamu! PangidohononHu ma tu Ama i asa dilehon tu hamu pangondian na asing, asa i mandongani hamu salelengna i!

U1: Haroro ni Tondi Parbadia i do, na tahalashon sadarion umbahen na pungu hita dibagas joro on mamuji Debata Ama, Anak nang Tondi Parbadia i, na sinondangan ni Thema: ***Ulaon ni Tondi Parbadia Di Ngolu Ni Angka Na Porsea!***

U2: Nuaeng pe tapahibul ma roha nang pingkiranta laho marsomba dohot mamuji Debata. Marende ma hita sian BE. No. 102:1-3 “O Tondi Parbadia I Bongoti” ***(Mulak ma barisan prosesi dung marende ruas ni huria)***

H: **Mangendehon BE. No. 102:1-3 “O Tondi Parbadia I Bongoti”**

O Tondi Parbadia i, bongoti rohanami be, ro sipatiur roha. O sondang sian surgo i, sondangi rohanami be, tu halalas ni roha. Asa, masa, patupahon, pinodahon ni hataMu. Sai tu hami ma rohamu.

Ho do silehon roha i di nasa na porsea i, tumpahi rohanami. Patogu rohanami be, pasar hatam tu sasude, sai tong dongani hami. On pe, sude parrohaon, hatuaon lehononMu. Sipujion do goarMu. (Jongjong)

Sai pargogoi ma hami on mangihuttihut hataMon dipardalanannami. Haporseaonnami pe tambai tung masa aha pe, na bernit taononnami. Tatap,tatap sude hami, rohanami pasonanghon, hajolmaon hamonanghon.

02. Votum - Introitus - Tangiang

U1: Marhitehite Goar ni Debata Ama dohot Goar ni AnakNa, Tuhan Jesus Kristus dohot Goar ni Tondi Parbadia, na tumompa langit dohot tano on. Amen. Songon on ninna Tuhan Jahowa: LehononKu tu hamu roha na imbaru dohot tondi na imbaru tu bagasan ateatemuna, jala unsatonKu do roha batu sian dagingmuna, jala lehononKu tu hamu roha na marpangkilalaan. Jala lehononKu ma TondingKu tu bagasan

ateatemuna, Ahu do mambahensa, asa marparange hamu di bagasan angka PatikHu, angka uhumHu pe radotanmuna jala patupaonmuna do.
Haleluya!

H: (Mangendehon) “Haleluya”

Haleluya, Haleluya, Haleluya

U2: Martangiang ma hita: Ale Tuhan Debata, Amanami ! Ho do manondangi jala mangajari roha ni angka na porsea di HataM marhitehite Tondi Parbadia. Sai buhai ma rohanami asa ture parrohaonnami marhitehite TondiM i, asa tongtong gok dame rohanami manghalashon hagagoonNa i marhitehite Tuhan Jesus Kristus Tuhannami. Amen. **(Hundul)**

03. Marende BE. No. 462:1+4 “Ale Tondi Parbadia”

Ale Tondi Parbadia, sai songgopi hami on. Rohanami ma paria lao mamuji Ho tongtong. Ho tongtong. Ho Tongtong, lao mamuji Ho tongtong.

Jesus Kristus tangi bege, dok ma amenMi disi. Suru ma tu rohanami hagogok ni TondiMi. Hagogok, hagogok, hagogok ni TondiMi.

04. Patik

U1: Tatangihon ma Patik ni Debata di Pesta Parjolo Pentakosta sadarion ima na tarsurat di Ulaon Ni Apostel 20:28. Songon ma didok disi: “Antong, ramoti hamu ma dirimu ro di sandok panggungan i, ai dipatindang Tondi Parbadia i do hamu gabe simatamata i, asa diparmahani hamu huria ni Tuhan i, na tinobusNa marhitehite sian mudarNa sandiri”.

U2: Disi do sahatna. Antong, rap mangido gogo ma hita tu adopan ni Debata laho magulahon na hombar tu patikNa i!

H: Ale Tuhan Debata, sai pargogoi ma hami mangulahon na hombar tu patikMi. Amen

05. Marende BE. No. 109:1-2 “Sai Songgopi Hamion”

Sai songgopi hami on ale Tondi Parbadia. Sai ajari ma tongtong hami on huhut paria. Martangiang tu Tuhanta, asa tongtong oloanNa.

Tondi Hasangapon i sai ingani rohanami. Pargogoi ma hami be maralohon dosanami. Asa tung malua hami sian hadosaonnami.

06. Refleksi - Manopoti Dosa - Bagabaga Hasesaan Ni Dosa

- U1: Huria na hinaholongan ni Tuhanta Jesus! Tondi na pasadahon dohot na papunguhon do Tondi Parbadia i, ndada tondi na manirang dohot na paserakhon angka na porsea. Halak naung digohi Tondi i sai radotanna do hasadaon ni Tondi, marhite na mamparangehon parange ni Kristus ima martoruk ni roha situtu, marlambok jala marlambas ni roha, masihehean dibagasan roha na holong.
- U2: Tondi Parbadia i do na mandongani hita dibagasan angka hagaleonta. Na sian tano do jolma i, na mura matapor jala serba terbatas, dibatasi ruang dan waktu, terbatas di gogo, dipingkirkan nang di angka sibahenon. Nandang dibuat Tondi i angka hagaleon i sian diri ni jolma i, alai lam dipatuduhon jala disadarhon Tondi i do jolma di angka hagaleonna. Dung mananda jolma i di angka hagaleonna ditogu Tondi Parbadia i do hita asa marposniroha dipandonganion dohot pangurupion ni Jesus Kristus. Didongani jala diurupi Tondi Parbadia i do hita di angka hagaleonta i, gabe sun timbul hagagoon di angka hagaleon.
- U1: Tondi Parbadia i do nang na mangajari huriaNa i laho mangantusi hata ni Debata. Ndada holan mangajari taringot hata ni Debata, alai laos Tondi Parbadia i do paingothon hata ni Debata tu roha ni jolma i. Tondi Parbadia i do na paingothon angka na porsea i asa sai mardalan di hasintongan ni hata ni Debata. Molo diulahon jolma i dosa, sai dipaingot Tondi i do jolma i, na so hombar be pangulaonna i tu hasintongan ni hata ni Debata. I do mambahen angka na porsea i sai susah panghilalaanna molo diulahon dosa i. Molo so adong Tondi i, na boi do jolma i gabe sonang panghilalaanna mangulahon dosa i. Ditogu Tondi do tu hita asa marhamubaon ni roha!

H: (Mangendehon) BE. No. 424:1 "Soara Ni Tondi" (Jongjong)

Soara ni Tondi ni Tuhanta i, jotjot dilaosi, ditulak ho i. Sai tanda jeamu, pauba roham; dapothon Tuhanmu sisesa dosam.

- U2: Nuaeng tatopoti ma dosanta na godang i tu adopan ni Debata! Martangiang ma hita: Ale Tuhan Debata, Pargogo na so hatudosan jala Amanami! Hujou hami do GoarMu na badia i, ala na targogot hami marningot dosanami. Nunga mangalaosi hami di patikMu, ima marhite sian tubutubu ni rohanami na roa i, nang sian panghataionnami na so ture, ro di pangoloionnami di hisaphisap ni rohanami. Nandang marguru

tu Tondi i hami marparange, gabe jotjot do hami pasaut hisaphisap ni dagingnami: parmainanon, hahodaron, pargadombuson, hadatuon, parmuseumuon, parbadabadaan, pangiburuon, rimasrimas, pargutugutuon, parsalisian, partahitahion, bunubunu, parmabuhon dohot haormuson.

U1: Nandang huhaholongi hami Ho sian nasa rohanami dohot nasa ateatenami dohot nasa tondinami dohot nasa gogonami; nang dongannami ndang doshon dirinami hubahen hami. Jotjot do hami marpangunsandean tu dirinami, uju masa hamaolon, jala ndang pos rohanami dipandanganionMu di angka hagaleonnami. TondiMi do na papungupungu huriaM asa masijaloan jala masihaholongan songon angka ruas ni daging ni Tuhan Jesus Kristus na badia i, alai jotjot do hami gabe masihosoman jala masilatean.

U2: O Tondi Parbadia, pangapul di na marsak roha, pamalum ma saluhut na bernit binahen ni dosanami! Ro ma ho mangingani hami, asa marlas ni roha hami mangulahon lomo ni rohaM. Sai sesa sude dosanami, asa mangolu hami dibagasan asi ni rohaM, Sipangolu hami dohot ala ni GoarMu na badia i. Ale Tuhan, sai asi ma rohaM di hami halak na dangol on! Amen

H: ***(Mangendehon) BE. No. 171:2 “Tandai Ma Au”***

Asi ma rohaM, taringot tu pangalahongku. Olo tutu, jotjot do na lilu dalanku. Sesa dosangku, sude Debata

U1: Antong tatangihon ma bagabaga ni Debata taringot hasesaan ni dosanta: Parasi roha jala pardengganbasa do Jahowa, lambat tarrimas jala Parasiroha godang. Nandang dibahen tu hita hombar tu angka dosanta, jala ndang dibaloshon tu hita hombar tu angka hajahatonta. Songon asi ni roha ni amaama mida angka anakna do, asi ni roha ni Jahowa di angka na manghabiari Ibana. Hasangapon ma di Debata na di ginjang!

H: Amen ***(Hundul)***

07. Marende BE. No. 461:1+3 “Songgop Tu Hami”

Songgop tu hami na di joloMon, o Tondi ni Debatangki. Uhir patikMu tu rohangkinon, o Tondi ni Debatangki. Bereng siholhu di haroroMi, molo Ho ro, nda hisar tondingki? Didihon ma tu au on apiMi, o Tondi ni Debatangki.

Lehon hataM i ma tau podanghi, Debatangki na gogo i. Asa sai talu sude musuMi, Debatangki na gogo i. Manghatindanghon tongtong goarMi, asa malua pardosa disi. Asa dijangkon Tuhanta ma i, Debatangki na gogo i.

08. Epistel: Joel 3:1-5 (Alkitab TB LAI: Yoel 2:28-32)

U2: Turpuk Epistel di Pesta Parjolo Pentakosta sadarion ima na tarsurat di Joel 3:1-5. Tajaha ma secara responsoria! Jadi dung songon i: PangusehononHu ma TondingKu tu nasa sibuk, gabe manurirangi ma angka anakmuna dohot borumuna, marnipi ma angka sintuamuna, jala maralatan angka dolidolimuna.

H: Dohot do tu angka naposomuna baoa dohot boruboru pangusehononHu di angka ari i TondingKu.

U1: Jala pamasaonHu do angka partinandaon di langit dohot di tano on: Mudar dohot api dohot timus na marsijongjong.

H: Muba do mata ni ari gabe haholomon, jala bulan gabe mudar, patujolo ni ari haroro ni Jahowa na bolon jala na songkal i.

U2: Alai nasa na manjou goar ni Jahowa, malua do, ai di atas ni dolok Sion dohot di Jerusalem masa haluaon, songon na pinarbaga ni Jahowa hian, jala ditongatonga ni halak na malua i do angka na jinou ni Jahowa.

U1: Ima sahatna. Martua do angka na tumangihon hata ni Debata jala na umpeopsa.

H: Amen

09. Marende BE. No. 640:1-2 “Haholongon Sian Ginjang”

Haholongon sian ginjang, las ni roha na hot i. Tumpal ni asi ni roha sai bongoti rohangki. Jesus na gok asi roha dohot haholongon i, baen malua, baen martua hami na tahutan i. (Jongjong)

Lehon Tondi haholongon tu parroha na bojok. Bagabaga hadameon sahat baen tu hami on. Jesus Alpha nang Omega bona ni haporseaon. Sai padao ma angka dosa, sai palua hami on.

10. M. Haporseaon

U2: Tahatindnaghon ma haporseaonta i, songon na hinatindanghon ni donganta sahaporseaon di sandok portibion. Rap ma hita mandok:

H: Ahu posea di Debata Jahowa, d.u...

11. Koor:

1. _____
2. _____

12. Tingting

13. Koor:

1. _____
2. _____

14. Marende BE. No. 641:1.... “O Tondi Porbadia I” (P. Pelean)

O Tondi Porbadia i, sigohi parluhutan. Marolopolop dolok i, marhasak nang galumbang. Saluhut na tinompa i, gok be las ni rohaNa i, marsurak haleluya.

O Tondi Porbadia i pabangkit panurirang. Papatar asi holongMi tu angka na hansitan. Sumurut do na holom i, tubu ma panghirimon i, endehon haleluya.

-----**Musik**-----

Di Tondi Porbadia i raphon Debata Ama dohot Tuhanta Jesus i, Sitobus manisia. Naung mate di hau silangi i, hehe manaek tu surgo, endehon haleluya.

O Tondi Porbadia i sigohi langit tano. Pajongjong harajaonMi di saluhut bangso. Sai parroha i huriaMi pasangap Kristus Tuhan i. Olophon, haleluya.

15. Jamita: Johannes 14:15-26

16. Marende BE. No. 645:1... “Ro Ma Ho Parasiroha” (P. Pelean)

Ro ma Ho parasiroha sai pagirgir rohangkon, mangendehon denggan basa nilehonMu di au on. Tiruonhu ma suruan mangendehon sangapMi. Pujionhu Ho Jahowa, partanobatoanhi.

Na malua do tondingki ala hagagoonMi. Pos rohangku boanonMu diringkon tu surgo i. Jesus sai lului au, atik tung na lilu au. Nadihophop Ho do au na mambahen mangolu au.

-----**Musik**-----

*Ganup ari au marutang na so hagararan au. Nandang tarasam denggan basa na binaenMu na tu au. Sai tarunjun do rohangku maninggalhon holongMi. Sai sahapi ma rohangku, ngolungki di Ho ma i (**Jongjong**)*

17. **Parsuruon**

Parjamita:

Nunga diusehon Debata tu hita TondiNa i jala disuru do hita laho manurirangi tu saluhut bangso. On pe borhat ma hamu mamaritahon barita na uli marhite ulaonmuna jala radoti hamu ma patikNa i. Pangke hamu ma nasa silehonlehon ni Tondi i laho papatarhon hinauli ni Tuhan i dohot patandahon diri ni Tuhan i tu angka dongan. Pos ma rohamuna: Ndang tadinghononNa hamu so marama. Didongani jala diurupi Tondi i do hamu!

H: **(Mangendehon) BE. No. 730:3 “Sai Patau Ma Au Tuhan”**

Sai patau ma diringku ale Tuhan, papatarhon hinauliMi Tuhan. Suru ma TondiMi saor tu rohangki, lao patandahon diriMi tu donganhi.

18. **Tangiang Panutup:**

Tangiang Pelean

Tangiang Pentakosta

Tangiang Ale Amanami

Pasupasu